

DIDZA' BSÖLĚ'Ě PABLO YÖDZ COLOSAS

**Pablo rugapĕ' Dios bunách
queĕ' Cristo nacu'ĕ Colosas**

1 Neda', Pablo, naca' gbaz queĕ'
Jesucristo le rĕ'nnĕ' cni Dios,
dzagbi' neda' bi'i bóchi'ru' Timoteo.
²Rugapa' Dios lbi'ili', nacli' quizi
queĕ' Dios, len nacli' bóchi'tu'
réjlĕ'li' Cristo zoali' Colosas.
Rnabda'-nĕ' Xuzru' Dios uzá'
ladxĕ'ĕ queĕli', len gunĕ' ga soa dxi
icj ládxi'dau'li'.

Pablo rulidzĕ' Dios, rĕ' Lĕ': "Xclenu'"

³Rétecztu'-nĕ' Dios, Xuzĕ'
Xanru' Jesucristo: Xclenu', cati'
rulidztu'-nĕ' Dios, rnábitu'-nĕ' bi
gunĕ' queĕli' ⁴le byónitu' didza' ca
réjlĕ'li' Jesucristo, len ca nadxi'ili'
yúgu'tĕ nup náquigac quizi queĕ'
Dios. ⁵Cni runli' le runli' löz le
nuzóĕ' queĕli' Xanru' ni' yehua'
yubá, lĕ na' byónili' qui cati'
bé'lentú' lbi'ili' didza' le nac gdu'tĕ
li qui didza' dxi'a. ⁶Didza' dxi'a
na' bdxin queĕli' ca rdxin ca' gdu'tĕ
yödzlyú. Run dxin len rac lban
qui, gdu'tĕ yödzlyú, la' tuz ca rac
ga zoali', dza ni'tĕ ga rdxintĕ na'a
dza, cati' ni' byónili' len le nactĕ
bénbĕ'li' le ruzá' ladxĕ'ĕ queĕru'
Dios. ⁷Busĕdnĕ' lbi'ili' lĕ ni Epafras,

bönni' nadxi'iru'-nĕ', rúnlenĕ' netu'
tsaxón dxin len naquĕ' ca' huen
dxin gdu queĕ' Cristo, ráclenĕ'
lbi'ili'. ⁸Bönni' ni gdíxjöi'nĕ' netu'
ca nadxi'ili' lza'li', le runĕ' Dios Bö'
La'y ga gac gunli' cni.

⁹Qui lĕ ni na' netu' ca', dza
ni'tĕ ga rdxintĕ na'a dza cati'
gúquibe'itu' lĕ ni, cutu ca' rzoa
dxitu' rulidztu'-nĕ' Dios, rnábitu'-nĕ'
gáclenĕ' lbi'ili', len rnabtu' lahuĕ'
gunĕ' ga gúnbĕ'li' gdu le rĕ'ncznĕ'
Lĕ', len gunnĕ' queĕli' yúgu'tĕ yöl-la'
rac szxóni len yöl-la' rejni' le rgu'ĕ
rĕ'u Dios Bö' La'y. ¹⁰Cni rnábitu'-nĕ'
quiĕ gac gunli' ca ral-la' lun nup
náquigac queĕ' Xanru', gunli'
yúgu'tĕ le rdzag ladxĕ'ĕ Lĕ', len
sáqui'li' gunli' yúgu'tĕ le nac dxi'a,
len gacr gdu ca núbĕ'li'-nĕ' Dios.
¹¹Rnábitu'-nĕ' utipĕ' ládxi'li', gunnĕ'
queĕli' yöl-la' huac gdu queĕ', quiĕ
gac gua' glenli' yúgu'tĕ, len cözli'
zxön ladxĕ' len udziji ládxi'li'. ¹²Lu
yöl-la' rudziji queĕli' gul-guiĕ' Dios
Xuz: "Xclenu'", le budödĕ' lu na'ru'
gata' queĕru' latj lu yení' queĕ',
gunru' tsaxón nup náquigac quizi
queĕ'. ¹³Dios Xuz na' buslé' rĕ'u lu
na' nu rna bĕ' latj chul, len budödĕ'
rĕ'u ga na' rna bĕ'ĕ Zxi'nczĕ', Nu
nadxi'inĕ'. ¹⁴Zxi'nĕ' na' böa'uĕ' rĕ'u,

gutiè' uláz queèru', len bunít lahuè'
rè'u ca nac dul-la' gbága'ru'.

**Nuhuöacru' tuz len Dios le
gutiè' uláz queèru' Cristo**

¹⁵Cristo naquè' tuz ca naquè'
Dioscz, Nu curlé'iru'. Zoaczè' Lè'
zí'atèl ca yúgu'tè le benè' Dios. ¹⁶Lu
nè'è Cristo benè' Dios yúgu'tè le
dè, le nacuá' luzxbá, len le nacuá'
luyú, yugu' le rlé'iru' len yugu' le
curlé'iru', lè na' nacgac latj blau,
len yugu' yöl-la' uná bè', len le
nadél-li'gac yöl-la' zxön, len yugu'
yöl-la' huac qui yehua' yubá len
qui luyú ni. Yúgu'tè benè' Dios
lu nè'è Cristo quiè uzi'è xbey Lè'.
¹⁷Cristo zoaczè' zí'al ca yúgu'tè
le dè, ati' yúgu'tè nacua'tecz ni'a
queè' Lè'. ¹⁸Cristo naquè' Xangac
bunách queè', len runödzej' quequè'
yöl-la' na'bán. Naquè' ca' Nu gzu
lau bubán tsaz lu yöl-la' gut. Zí'al
Lè' bubanè' tsaz lu yöl-la' gut quiè
gáctèrè' blau ca yúgu'tè le dè. ¹⁹Cni
guc, le bdzag ladxè'è Dios Xuz
soalen Cristo gdu le nacczè' Lè'.
²⁰Ni'a qui le benè' Cristo, Dios benè'
ga gac luhuóac tuz len Lè' yúgu'tè
le dè, le nacuá' luyú, len le nacuá'
luzxbá. Bunè' leygac tuz len Lè' le
bulaljè' xchönè' Cristo, gutiè' lè'i
yag cruz.

²¹Lbi'ili', zí'atèl nulá'alenli'-nè'
Dios len gucli' ca bönni' cuta'le'i
Dios dxi'a lu icj ládxi'dau'li' ni'a qui
dò' bia'li', san na'a chbunè' lbi'ili'
tuz len Lè'. ²²Cni guc, le budód
cuinè' Cristo, gutiè' uláz queèli'
quiè gac uschinè' lbi'ili' lahuè' Dios,
nacli' quizi queè' len gacli' gdu
dxi'a, nutu nu bi gac gnè queèli'.
²³Cni gac chqui' uga'nli' tsutsu ca

réljè'li' Cristo, gacli' ca tu yu'u xzoa
ga rè' xlibi zò'ö qui, len cutu tseaj
bö' ládxi'dau'li' ca runli' löz didza'
dxi'a byónili', lè na' rac lban qui
gdu'tè yödzyú le benè' Dios zxan
luzxbá. Dios buzóè' neda', Pablo,
quiè gaca' huen dxin qui didza'
dxi'a na'.

Dxin budödè' Dios lu nè'è Pablo

²⁴Rudzijda' na'a ca nac le rzaca'
rgui'a quiè gáclena' lbi'ili', len
ruúdx rza'a lu gdu ca nayá' nabana'
le rzaca' rguí'lena' tsaxxón Cristo
uláz qui gdu ca nayá' nabanè' Lè'
le nac bunách queè'. ²⁵Dios benè'
ga naca' huen dxin quegac bunách
queè' Cristo, runa' xchinè' Dios, le
budödè' lu na'a guna' quiè gáclena'
lbi'ili', quiéj'ö'a gdu ca nac xtidzè'è
Dios. ²⁶Ruzéjni'da' bunách le
nagachi', lè na' bgachi' dza ni'tè,
nutu nu benbè' lei, san na'a Dios
chbului'inè' bunách náquigac quizi
queè' ca nac qui. ²⁷Dios gu'ncznè'
gunè' ga lumbè' yugu' yöl-la' tsahui'
gdu qui le nagachi' ni, lè na' ta'yöni
bunách gza'a. Cni rna lè na' bgachi':
"Cristo naquè' tuz len lbi'ili', len
naquè' le nac löz gdél-li'li' tsazli' lu
yeni' queè'."

²⁸Runtu' lban queè' Cristo,
rusa'tu' ládxi'gac yúgu'tè bunách,
len gazxj ga rè' ruséditu' lequè'
yöl-la' rejni'i, quiè gac uschintu'
lahuè' Dios yúgu'tè bunách, nacquè'
gdu ladx'i' le nacquè' tuz len
Jesucristo. ²⁹Quiè gac cni runa'
dxin, len rui' ladxa'a udx guna' lè
ni, ruguna' dxin yöl-la' huac gdu na'
runnè' quia' Cristo.

2 Rè'nda' gnózili' rui'tsca
ladxa'a runa' le gacien lbi'ili'

lenca' le gaclen bunách yödZ
 Laodicea, len le gaclen ca' yúgu'tè
 nup gatga gulale'i neda'. ²Runa'
 cni quiè la'díp ládxi'que', len
 lacque' tuz lu yöl-la' nadxi'i, len
 luzi'è xbey yúgu'tè yöl-la' tsahui'
 qui yöl-la' run löz gdu le runn
 queèru' yöl-la' rejni'i. Cni rac quiè
 lunb'è le bgachi' queè' Dios Xuz,
 lè na' nacczè' Cristo. ³Lu nè'è
 Cristo ruzi'ru' xbey yúgu'tè yöl-la'
 tsahui' qui yöl-la' rac szxóni len
 yöl-la' rejni'i. ⁴Lè ni rèpa' lbi'ili',
 cui gac nu si' ye'i lbi'ili', nu güi'
 didza' tséjlè'ru' le cunácZ. ⁵Zal-la'
 zoa' zi'tu' ga zoali' lu gdu ca nayá'
 nabana', lu bö' naccza' zóalena'
 lbi'ili' len rudzijda' le rlé'ida' rō'
 zxba queèli' len nac tsutsu ca
 réjlè'li' Cristo.

⁶Qui lè ni na', ca na' gzxì' lu na'li'
 Xanru' Jesucristo, lèzca' cni ral-la'
 gunli' yúgu'tè le gunli', dzaguè'
 lbi'ili' Lè'. ⁷Ca na' nun luí yag ga rè',
 lenca' ca na' nayás zō'ō lu xlibi zō'ō,
 gul-zoalen Cristo. Gul-zóa tsutsu
 ca réjlè'li' Lè', ca na' chnazèdli'.
 Gul-guiéteczè' Dios: "Xclenu'."

Le cub nacru' le dzagru'-nè' Cristo

⁸Gul-gún chi'i cuinli' cuigüi'li'
 latj nu si' ye'i lbi'ili', nu ugún dxin
 yöl-la' rejni'i quegac bunách len
 yugu' didza' ta'nazè' nac gdutè li,
 ca nac le ta'lèbi bunách tun, len
 ca nac le tu'sèdi bunách le nac qui
 yödZlyú ni len clèg le nac xtidzè'è
 Cristo.

⁹Zoalen Cristo gdutè le nacczè'
 Dios zal-la' böaquè' bunách, ¹⁰ati'
 lbi'ili' napli' gdutè le naquè' Dios
 le dzagli'-nè' Cristo, Nu rna be'i
 yúgu'tè nup ta'ná bè' len bönni'

bi dè lu na'què'. ¹¹Narugu lu
 xpéla'què' bönni' judío le ruluí'
 náquicnè' queè' Dios, san lbi'ili', le
 dzagli' Cristo, zoalen lbi'ili' le ruluí'
 náquili' queè' Dios, le cunáquini lu
 ni'a lu na'gac bunách. Tu'güè' tu
 guiddau' bönni' judío, san lbi'ili',
 nadúa gdutè yöl-la' bunách queèli'
 bénlenli' dul-la'. Cni nac queèli' le
 benli' tsaxxón Cristo cati' gutiè'
 lè'i yag cruz. ¹²Cati' bdil-li' nis
 bgáchi'lenli'-nè' Cristo tsaxxón
 yeru ba len bubánlenli'-nè' tsaxxón
 le gyéjlè'li' Dios, len yöl-la' huac
 queè' buspanè' Cristo lu yöl-la' gut.
¹³Zi'atèl gucli' ca nup chnatgac
 ni'a qui dul-la' gbága'li' len cutu
 gzoalen lbi'ili' le ruluí' náquili'
 queè' Dios, san na'a Dios nunè' ga
 nabánlenli'-nè' tsaxxón Cristo, len
 bunít lahuè' lbi'ili' ca nac yúgu'tè
 dul-la' gbága'li'. ¹⁴Dios busulé'
 yugu' le nabága'ru' le nayujgac lu
 zxba queè', lè na' tu'quí rè'tu. Bugüè'
 lè na' nabága'ru' len bdè'è lei lè'i
 yag cruz ca tu le nabaguè'è Cristo.
¹⁵Cati' gutiè' Cristo lè'i yag cruz,
 bugüè' yöl-la' huac uná bè' quegac
 bö' xöhui' uná bè' len quegac nup
 dè lu na'gac yöl-la' huac xöhui', le
 bulu'è lahui le nacgac bö' xöhui' len
 bugüè' yöl-la' huac uná bè' quegac,
 le gutiè' lè'i yag cruz na'.

Ral-la' güi' ládxi'ru' le nac qui yehua' yubá

¹⁶Qui lè ni na', cutu güi'li' latj nu
 uquí lbi'ili' ca nac le ri'j ráguli' o
 le curunli' zxón yugu' dza lni, o
 le curunli' zxón beo' zi'a ruzé, o
 le curunli' zxón yugu' dza la'y
 quegac bunách. ¹⁷Yúgu'tè lè ni nac
 ca tu bxin qui le ral-la' gac, ati' le

rulu' yúgu'tè lè ni naquè' Cristocz.
 18 Cutu güi'li' latj nu gun ga unitli'
 le ral-la' si'li', nu runtsca bayúdx
 ga lac nöxj ládxi'gac bunách len
 lun zxön yugu' gbaz la'y. Tu'gutsa'
 cuinquè' le cutu gulalé'inè', len tun
 ba zxön cuinquè' ca nac le dzö'z
 icjuè' lu yöl-la' bunáchz quequè'.

19 Nu run cni cutu da' Cristo, Nu
 nac Xanru' len ruzóè' tsutsu gdu
 ca nayá' nabanè', le nacru' rë'u.
 Rugahuè' lei, len runè' ga nac tuz
 ni'a qui le zeaj lu dxit lu bin, ati'
 rzxön gdu ca nayá' nabanè' ca
 rë'nnè' Dios uxönè' lei.

20 Lbi'ili' chnátlenli'-nè' Cristo
 quiè cutur la'ná be'i lbi'ili' zxba
 qui yödzyú. ¿Bizx quiè runli' tsca
 ni nacli' qui yödzyú, len runli' ca
 ta'ná bè' zxba qui? 21 Cni ta'ná yugu'
 zxba qui yödzyú ni:

Cutu quitjnu' lè ni;

Cutu gagu' lè na';

Cutu canu' yetú le dë.

22 Yúgu'tè lè ni la'nít cati'
 chbugunru' leygac dxin. Cni nacgac
 le ta'ná bè' bunách len yugu' zxba
 nazí' lu na'què'. 23 Le nactë, yugu'
 zxba ni, ráquiru' napgac yöl-la'
 rejni'i. Tun ga rulu' cuinru' ca
 bunách gdau', len ga rulu' cuinru'
 nöxj ladxi', len ga rusaca' zi'ru' gdu
 ca nayá' nabinru', san zxba ni cutu
 ca' taclen rë'u quiè gac gna bé'iru'
 yugu' le rzë ládxi'ru' lu yöl-la'
 bunáchz queëru'.

3 Na'a, chqui' nubánlenli'-nè'
 Cristo, gul-güi' ládxi'li' le
 nacgac qui yehua' yubá ga ni' röl'è
 Cristo cuít lë'è yubél Dios, ga
 naquè' blau. 2 Gul-sá' ládxi'li' le tac
 xtsa', len clëg le tac luyú ni. 3 Nac
 queéli' tsca chnatli', ati' yöl-la'

na'bán queéli' run chi'è Cristo ga
 ni' zoaczè' Dios. 4 Cristo nabánili'
 lbi'ili'. Cati' ulu'í lahuè' Lè', ni'r ulu'í
 lauli' ca' lbi'ili' tsaxxón len Lè' lu
 yení' queè'.

Yöl-la' na'bán gul len

yöl-la' na'bán cub

5 Qui lè ni na', gul-gún ga la'nít le
 nacua'len lbi'ili' qui yödzyú ni:
 yugu' le cunác,
 len le nacgac xöhui',
 len yugu' le rzë ládxi'li' le cunác,
 len yugu' le rzë ládxi'li' le nac
 xöhui',

len yöl-la' ruhuidi',

le nac tuz ca nu rij ladxi' bdau'
 guiöj bdau' yag, le cutu rij ladxi'
 Dios nu ruhuidi'. 6 Le tun yugu' le
 cni, Dios gunè' zxguia' yúgu'tè nup
 cutún ca rna xtádzë. 7 Yugu' dul-la'
 cni benli' ca' lbi'ili' cati' ni' nadödlí'
 lu na'gac. 8 Na'a, cutur gunli' yugu'
 lè ni:

cutur gdza'ali';

cutur leyli';

cutur nu gunli' zi';

cutur gnë xöhui'li';

cutur gnali' le cunác.

9 Cutu si' yé'ili' lza'li' tuli' yetuli' le
 chnuca'nli' le gucli' zi'al, len yugu'
 le benli' zi'al. 10 Chnacli' bunách
 cub, len tu tu dza rcubli', ruhuöaclí'
 ca nac Nu na' bun lbi'ili', quiè
 gúnbè'li' Lè' gdu ca naquè' Lè'. 11 Le
 chdzagru'-nè' Cristo:

cutur nacru' bönni' gza'a len
 bönni' judío;

cutur nacru' bönni' narugu
 lu xpéla'què' le nac bè' nu
 naqui queè' Dios len bönni'
 cunarugu lu xpéla'què' lè na'
 nac bè';

cutur nacru' bönni' ta'yejni'i len
bönni' cuta'yejni'i;
cutur nacru' bönni' nadá'ugac
len bönni' cunadá'ugac.

Na'a, Cristo naquè' yúgu'tè le nac
lsaca' len dzaguè' yúgu'tèru'.

¹²Dios nadxi'inè' lbi'ili' len gröè'
lbi'ili' quiè gáquili' quizi queè'. Qui
lè ni na', ral-la':

güi' ládxi'li' lza'li',
len gacli' dxi'i ladxi',
len nöxj ladxi',
len cuidi' ladxi',
len cözli' zxön ladxi'.

¹³Chqui' rac didza' bizxj tuli' len
yetuli', gul-guá' glen lza'li' tuli'
yetuli', len gul-nít lau lza'li' tuli'
yetuli' ca na' benè' Cristo, bunít
lahuè' lbi'ili'. ¹⁴Le nactèr blau
ca yúgu'tè lè ni, ral-la' gdxili'
yúgu'tè bunách, le nac yöl-la'
nadxí'i le run ga nacru' tuz len
ga nacru' gdu. ¹⁵Gul-güi' latj gna
be'i icj ládxi'dau'li' le rbequi dxi
icj ládxi'dau'ru', le runnè' queèru'
Dios. Qui lè ni na' bulidzè' lbi'ili',
quiè gacli' tuz lu gdu ca nayá'
nabanè' Cristo. Gul-guié' Dios:
"Xclenu'."

¹⁶Gul-sí' lu na'li' xtídzè'è Cristo
le gac queèli' ca tu yöl-la' tsahui'
zxön. Le zoalen lbi'ili' yöl-la'
rejni'i queè' Dios, gul-sèdi len
gul-zejni'i lza'li' tuli' yetuli'. Gdu
ládxi'li' gul-gúl-l queè' Dios yugu'
salmo, len yugu' le rul-l yöl-la' ba
len yugu' le rul-l la'y, guièli'-nè'
Dios: "Xclenu'." ¹⁷Yúgu'tè le
runli', le nac didza' rui'li' o le
nac dxin runli', gul-gún yúgu'tè
lu lè' Xanru' Jesús, len guièli'-nè'
Dios Xuz: "Xclenu'", dzaguè' lbi'ili'
Cristo.

**Le ral-la' gunru' qui lza'ru' le
náquiru' queè' Cristo**

¹⁸Lbi'ili', ngul nutság ná'lenli'
bönni', gul-gún ca rna xtídz'a'què'
bönni' qui queèli' ca ral-la' gunli', le
náquili' queè' Xanru'.

¹⁹Lbi'ili', bönni' nutság ná'lenli'
ngul, gul-dxí'i ngul qui queèli', len
cutu uzeyli' ba nadx lecnu.

²⁰Lbi'ili', bi'i ra'bán, gul-gún ca
rna yúgu'tè xtídz'a'què' xuz xna'li'.
Lè ni rdzag ladxè'è Xanru'.

²¹Lbi'ili', nul-li' nacli' xuzgac
bi'idau', cutu töd bè'i gut quinli'
zxi'nli', cui huò'a ládxi'cbi'.

²²Lbi'ili', nul-li' nacli' bönni'
nadá'ugac, gul-gún ca rna yúgu'tè
xtídz'a'què' xanli' luyú ni. Clègz
gunli' cni cati' tu'yúè' lbi'ili' ca
na' tun nup tè'ni lun ga la'dzág
ládxi'gac bunách, san gdu ládxi'li'
gul-gún xchinquè' ca ral-la' lun
nup tadxi Dios. ²³Ca nac yúgu'tè
le runli', gul-gún gdu ládxi'li',
gac ca runli' xchinè' Xanru' len
clègz ca runli' xchingac bunách.
²⁴Chnóziczli' ubi'è queèli' Xanru',
gunnè' queèli' le chnupé'è Dios
quegac nup nacgac zxi'nczè'.

Cni gac, le runli' xchinè' Xanru'
Jesucristo. ²⁵Nu rua' dō', ubi'è qui
nu na' Xanru' ca nac dō' rua' nu na',
le cutu utsè'è Dios ca ral-la' ubi'è
qui queègac bunách.

4 Lbi'ili', nul-li' nacli' xangac
bunách, gul-gún le nac tsahui'
len le nac dxi'a ca rugunli' dxin
yugu' huen dxin queèli'. Gul-tsajnéy
zoa ca' queèli' Xanli' ni' yehua'
yubá.

²Lbi'ili', yúgu'tèli', gul-lídzteczè'
Dios. Gul-spán ládxi'li' ulidzli'-nè'

Dios, len gul-guié': "Xclenu!"

³La' na'z cati' rulidzli'-nè' Dios, gul-náb-nè' ca' gáclenè' netu', gunnè' netu' latj quíxjö'tu' xtidzè'è Xanru', quiè gac uzéjni'tu' bunách le bgachi' ca' nac queè' Cristo. Le runa' cni nadzuna' lidx guia ni.

⁴Gul-náb-nè' ca' Dios, gunnè' neda' latj usájl la'ana' le bgachi' na' ca ral-la' guna'.

⁵Lu yöl-la' rejni'i queëli', gul-gún le runli' laugac nup cuta'yejlè' Cristo. Gul-guntsca dxin yugu' dza uzá' ladxè'è queëli' Dios, gunli' xchinè'. ⁶Ral-la' güi'li' didza' ca rdzag ladxè'è Dios len ca ral-la' gun nup náquigac queè'. Ral-la' gnózili' ca' nac ral-la' ubi'ili' didza', bi guiëli' tu tu bunách.

**Tu'gáp Dios lza'gac
bunách queè' Cristo**

⁷Le rac quia' ni quíxjöi'nè' lbi'ili' Tíquico, naquè' bóchi'ru' nadxi'iru'-nè'. Naquè' ca' huen dxin gdu queè' Xanru', rúnlenè' neda' tsazxón dxin queè' Xanru'. ⁸Qui lè ni na' rsöla'a-nè' ga zoali', quiè uzéjni'nè' lbi'ili' le rac quia', len utipè' ládxi'li'. ⁹Zéajlenè' lè' tsazxón Onésimo, bóchi'ru' na' nabáblenè' lbi'ili'. Naquè' ca' bóchi'ru' nadxi'iru'-nè', len rejle'è Xanru'. Chopè' ni la'guíxjöi'nè' lbi'ili' yúgu'tè le rac ni.

¹⁰Rugapè' Dios lbi'ili' Aristarco, yú'ulenè' neda' tsazxón lidx guia. Rugapbi' Dios ca' lbi'ili' bi'i Marcos, bi'i bönni' queënu ngul

zanè' Bernabé. Chgudxa' lbi'ili' bi gunli' queëbi' bi'i Marcos na'. Chqui' huidbi' ga zoali', gul-gún-bi' ba la'n.

¹¹Rugapè' Dios ca' lbi'ili' bönni' ni lè' Jesús, zoa yetú lè' Justo. Nacuá' zian bunách judío ta'yejlè' Cristo, san tsonnzè' ni ladj bunách judío tunè' tsazxón len neda' dxin qui le rna bè'è Dios, len sxzöni tu'huf' xzönè' neda'. ¹²Rugapè' Dios lbi'ili' Epafras, bönni' na' nababè' ca' lbi'ili', naquè' huen dxin queè' Cristo. Gdu ladxè'è rulidzè' Dios, ráta'yuteczè' lahuè' gáclenè' lbi'ili' quiè soali' gdu ladxí', len soali' ca' sina' gunli' yúgu'tè le rè'ncznè' Dios. ¹³Runa' lna' lau queè' Epafras na', rui'tsca ladxè'è lbi'ili' lenca' nup nacua' Laodicea, len nup nacua' Hierápolis. ¹⁴Rugapè' Dios lbi'ili' Demas, lenca' Lucas, bönni' na' ruún bunách, ati' nadxi'iru'-nè'.

¹⁵Gul-gáp Dios bóchi'ru' nacué' Laodicea, lenca' Ninfas len bunách queè' Cristo nacua' lidxnu Ninfas na'. ¹⁶Cati' udx ulabli' guich ni ga ni' zoali', gul-gún ga luláb lei bunách queè' Cristo nacua' Laodicea. Gul-láb ca' lbi'ili' guich na' la'söla' queëli' bunách Laodicea na'. ¹⁷Gul-guié'è Arquipo: "Bè' ladxu'u gunu' dxin na' budödè' lu na'u Xanru'."

¹⁸Neda', Pablo, ruzujcza' lu guich dídzadau' ni, rnía': Rugapa' Dios lbi'ili'. Gul-tsajnéy ca rac quia' ni nadzuna' lidx guia. Rnabda'-nè' Dios uzá' ladxè'è queëli' le nac dxi'a. Ca' gac.